

JOSUNE ARIZTONDO EAJ-KO EUZKADI BURU BATZARREKO IDAZKARIA

Baltasar Garzon epaileak AEKren aurka kaleratutako auto judizialak hautsak harrotu ditu Euskal Herrian azken hamabost egunotan. Josune Ariztondoren aburuz, jokamolde horren atzean, EAJri ez ezik, abertzaletasun osoari erasotzeko asmoa dago, baina erantzuna «lasaia eta didaktikoa» izan behar dela uste du.

«Ez dugu erori behar egoera tenkatzeko PPk jarritako tranpan»



JOSU ETXEBARRIOSTE

Joseba Arruti | BILBO

AEKren aurka Garzonek plaza-ratutako autoa abiapuntutzat hartuta, Josune Arizondo EBB-ko idazkariak egoera politikoa-ren inguruko hausnarketa egin digu, Sabin Etxeko goiko solairuko bere bulegoan.

■ **Orain arte Garzonen aurrean deklaratu duten inputatu guztiak aske geratu dira, haien aurkako inolako neurririk hartu gabe. Zure iritziz, zer adierazten du horrek?**

Deklarazio guztiak amaitu ez diren arren, argi dago ez dela nor-

mala hemen jazotzen ari dena. Pertsona batzuen izen onaren alde egin beharrean, horiek zikintzen ari den ustezko zuzenbidezko estatuaren jokabidearen berri hedabideen bitartez izan zuten deklaratzera deitu dituztenek, nahiz eta Garzonek leporatzen dizkienak gauza gogo-

EUSKO JAURLARITZA

“Garzonek AEKren aurka egindako autoaren bitartez, Eusko Jaurlaritzaren aurka doazela ematen du bete-betean»

GIZARTE KOHESIOA

“Euskal gizartean gairidituta eta ontzat emanda dauden gaiak hartu eta berriz iskanbilarako gai bihurtu gura dituzte»

rrak eta larriak diren. Halaber, harrigarria da deklaratzera joan direnean minutu bat ere ez dutela galdu Entzutegi Nazionalen salaketa horiek zertan diren ezagutzeko. Dena den, autoa ikusita, aurreikus zitekeen hori guztia gertatuko zela.

■ **Euskal gizarte zibila desgaturatzeko asmoa atzeman du AEK-k bere aurkako autoaren atzean. Bat al zatoz iritzi horrekin?**

Bai. Tentsionamendu kanpaina baten barruan sartu nahi gaituzte, eta guk ez dugu tranpan erori eta erradikalizazioaren alde egin behar. Txarto dagoena salatzen jarraitu behar dugu eta egin behar dena aldarrikatzen, baina eurek nahi gaituzten mendirako bidean jarri barik, euskararen normalizaziorako irabazita dauzkagun urratsetan atzera ez egiteko. Nik espero dut, berriro ere, Euskal Herriaren inguruan duen jokabideak ez diola etekinik emango PPko gobernari.

■ **Garzonen autoak bultzada politikoa duela esan dute hainbat euskal eragilek. Horrek oso izen itsusia dauka, epaile baten zereginari dago-kionez...**

Zenbait gauza agerikoak dira: auto horretan sarri aipatzen da Eusko Jaurlaritza, eta Garzonen aurrean deklaratu dutenek adierazitakoaren arabera, epaileak behin eta berriro galdetu die Jaurlaritzaren diru laguntzez. Hala ere, ez autoan eta ezta deklarazioetan ere ez da Na-

farroako Gobernua azaldu, nahiz eta Jaurlaritzaren kontzeptu berengatik laguntzak eman dizkion AEKri. Beraz, Jaurlaritzaren aurka doazen itxura guztia dauka honek. Horrek, beste behin, Garzonen bideari kutsu politiko jakin bat ematen dio, eta ez dakit bera konturatzen ote den zer-nolako kaltea egiten dion zuzenbidezko estatuari.

Sekula ez da jazo hain salaketa larriekin pertsonak deklaratzera eraman eta beste barik libre uztea, ia galderarik egin gabe gainera. Talde armatu bati laguntza ematea eta bertako kide izatea oso salaketa larriak dira gero diru laguntza batzuen inguruan galdetu eta ezer gertatu ez balitz legez jokatzeko. Nik ez dakit horrek zein izen daukan, baina jendeak Euskal Herrian nabaritzen du zer ari den gertatzen.

■ **Jaurlaritza behin eta berriz aipatze horren atzean, EAJ-rekiko nolabaiteko ohartarazpena dagoela uste duzu?**

Bai, baina ez bakarrik EAJ-rekiko, abertzaletasun osoari egin nahi baitiote kalte. Horrek hainbat fronte ditu: batzuetan hizkuntzaren sustapenaren aurka joko dute, besteetan sektorea ahuldu nahiko dute, bertan ari direnak erradikalizatu... Hori zeharo arriskutsua da, oso gai minberekin jokatzeko ari direlako. Euskal gizartean gairidituta edo ontzat emanda dauden gaiak hartu eta berriz iskanbilarako gai bihurtu nahi dituzte: